

- सरकारी तेल कंपनियों साफ कीनो-प्रदेश मांय तेल-गैस री कोई कमी नी है अर जनता ने सोच करण री जरूरत नी है।
- भारतीय जनता पार्टी रो 47 वॉ स्थापना दिवस आज मनायी ज्यो- प्रधानमंत्री नरेन्द्र मोदी कह्यो के पार्टी हमेशा राष्ट्र प्रथम री सोच ऊं समाज सेवा कीनी।
- राज्य मांय आंधी-बारिश रो सिलसिलो जारी - आज अर काल ई केई जिलां मांय आंधी चालण सागे बिरखा व्हेवण रा आसार।
- किसानां ने जैविक अर प्राकृतिक खेती ऊं जोड़बा रा मकसद ऊं राज्य मांय आपणो खेत-आपणी खाद अभियान सरू व्ह्यो।

000

सरकारी तेल कंपनियों साफ कीनो है के राज्य मांय पेट्रोल-डीजल अर रसोई गैस री कोई कमी नी है। कम्पनियों रा राज्य समन्वयक मनोज गुप्ता जयपुर मांय खबरनवीसां सागे बातचीत करता थकां बतायो के राज्य मांय सगळी तेल कंपनियों रा टर्मिनल काम कर रह्या है, जठे ऊं तेल अर गैस री पूर्ति लगातार करी जा रही है। श्री गुप्ता बतायो के शहरी हलकां मांय 25 अर गांवाई हलकां मांय 45 दिन मांय गैस री टंकियों री पूर्ति करी जा रही है। वे बतायो के फिलहाल रसोई गैस रा नुवा कनेक्शन नी दिया जा रह्या है।

000

ई बीचे प्रदेश मांय गैस री पूर्ति मांय गड़बड़ियां करण वाळी गैस एजेंसियां रे खिलाफ रसद महकमा कानी ऊं लगातार कार्यवाही करी जा रही है। डीग मांय एक गैस एजेंसी रो लाईसेंस रद्द कर दियो ज्यो।

000

भारतीय जनता पार्टी आज 47वॉ स्थापना दिवस मना रही है। ई मौके प्रधानमंत्री नरेंद्र मोदी, गृह मंत्री अमित शाह अर भाजपा रा अध्यक्ष नितिन नबीन समेत केई नेता कार्यकर्तावां ने शुभकामनावां दीनी। प्रधानमंत्री नरेन्द्र मोदी कह्यो के भारतीय जनता पार्टी हमेशा 'राष्ट्र प्रथम' री सोच ऊं समाज सेवा कर रही है। वे कह्यो के भाजपा रा कार्यकर्ता निःस्वार्थ सेवा, अटूट समर्पण अर सुशासन रा प्रति गहरा विश्वास सारू पिछाण्या जावे है। वीडियो संदेश मांय श्री मोदी कह्यो के भारतीय जनता पार्टी जनता रा भला माथे खास ध्यान देवे है।

000

प्रधानमंत्री नरेन्द्र मोदी कह्यो के भाजपा महिलावां ने आरक्षण देवण रो वायदो पूरो कीनो है। वे कह्यो के सरकार साल 2029 मांय व्हेवण वाळा चुणाव नारी शक्ति वंदन कानून रे मुजब करावणो तैय कर रही है। राज्य मांय ई भाजपा रो स्थापना दिवस उमाव सागे मणायी ज्यो। राजधानी जयपुर मांय भारतीय जनता पार्टी रा स्थापना दिवस कार्यक्रम री सरूआत पार्टी रा प्रदेशाध्यक्ष मदन राठौड अर मुख्यमंत्री भजनलाल शर्मा प्रदेश भाजपा कार्यालय माथे झण्डो फहरा र कीनी। मुख्यमंत्री भजनलाल शर्मा कह्यो के कार्यकर्तावां रा समर्पण अर संगठनात्मक निष्ठा रे कारण भाजपा दुनिया री सब ऊं मोटी सियासी पार्टी बण गयी है।

ई मौके राज्य री पैली वाळी मुख्यमंत्री वसुंधरा राजे ई श्यामा प्रसाद मुखर्जी, दीनदयाल उपाध्याय अर विजयाराजे सिधिया ने नमन कीनो अर अटल बिहारी वाजपेयी अर लालकृष्ण आडवाणी री विरासत ने सीख देवण वाळी बतायी। हनुमानगढ़, बाड़मेर, भीलवाड़ा अर पाली समेत केई ठाँडां भाजपा रा दफतरां माथे झण्डो फहराई ज्यो। सवाईमाधोपुर मांय पार्टी री ओर ऊं न्यारा-न्यारा कार्यक्रम सरू करी ज्यो।

000

रक्षा मंत्री राजनाथ सिंह कह्यो है के फौजियां ने आला दर्जा रा स्वास्थ्य सुबीता मुहैया करावण माथे सरकार खास ध्यान दे रही है। वे नई दिल्ली मांय सेना चिकित्सा कोर रा स्थापना दिवस रे मौके राखी ज्या कार्यक्रम मांय बोल रह्या हा। वे कह्यो के फौजी दिन-रात, हर रूत मांय अर हर हालात मांय देश री सेवा करे है। श्री सिंह कह्यो के सरकार सैन्य नर्सिंग सेवा री नर्सा ने रिटायर व्ह्यां पाछे पूर्व सैनिक रो दर्जा देवण रो फैसलो कीनो है।

000

राज्य मांय औद्योगिक विकास ने तेज् करण रा मकसद ऊं चलायी ज्यी राजस्थान निवेश प्रोत्साहन योजना-रिप्स रा तैत निवेशकां ने भांत-भांत री रियायतां दी जा रही है। ई रा तैत पात्र निवेशकां ने निवेश रा आधार ऊं सब्सिडी दी जावे है। ई सागे ई राज्य वस्तु अर सेवा कर-एसजीएसटी रो तीन चौथाई ताई पाछो देवण रो प्रावधान है। ई सागे ई बिजली शुल्क मांय छूट, भूमि रूपांतरण शुल्क अर जमीं ऊं जुड़ी दूजी फीस मांय ई रियायत दी जा रही है।

000

प्रदेश मांय एके-पाछे एक पश्चिमी विक्षोभ रा असर ऊं आंधी-बारिश रो सिलसिलो चाल रह्यो है। मौसम विभाग रे मुजब आज ई जोधपुर, बीकानेर अर अजमेर संभाग अर शेखावाटी हलका मांय कठे-कठे आंधी चालण सागे बिरखा व्ही, जद के आज रात केई सरहदी जिलां मांय आंधी सागे बारिश रा आसार है। मौसम केंद्र जयपुर रा निदेशक राधेश्याम शर्मा आकाशवाणी ने बतायो के पश्चिमी विक्षोभ रो सब ऊं बत्तो असर काल रेहवण रा आसार है।

000

ई बीचे राज्य रा घणखर हलकां मांय दिन अर रात री बगत पारो सामान्य ऊं नीचे चाल रह्यो है।

000

प्रदेश मांय आज "आपणो खेत-आपणी खाद" अभियान सरू करी ज्यो। किसानां ने रासायनिक खाद माथे निर्भरता कम कर र जैविक अर प्राकृतिक खेती री ओर मोड़बा रा मकसद ऊं चलायी ज्यो ओ अभियान 30 अप्रैल ताई चालेला। कृषि मंत्री डॉ. किरोड़ी लाल मीना बतायो के ई अभियान रा तैत देशी खाद, हरी खाद, जैविक खाद अर प्राकृतिक खेती रा तरीकां ने बधावो दियो जावेला। ई दौरान ग्राम पंचायत लेवल ताई किसान गोष्ठियां, रात्रि चौपाल, प्रभात फेरियां, सिखावण अर स्कूलां मांय जाग जगावण सरीखा कार्यक्रम राख्या जावेला।

000

राज्य सरकार प्रदेश री कृषि उपज मण्डी समितियां रा विकास सारू 40 करोड 63 लाख रुप्या ऊं बत्ती रकम मंजूर कीनी है। ई रकम ऊं जैसलमेर, रायसिंहनगर, नोखा, कोटपूतली अर डीग समेत केई मण्डियां मांय यार्ड अर संपर्क सड़कां बणावण सागे बिजली ऊं जुड्या काम कराया जावेला। ई रे अलावा मंडियां मांय किसानां रे आराम करण री ठौड़ां बणावण सारू प्रदेश री 116 मंडियां मांय 46 करोड 86 लाख रुप्या रा खर्च ऊं 781 किसान विश्राम स्थल बणाया जावेला।

000

लोकसभा अध्यक्ष ओम बिरला आज कोटा-बूंदी लोकसभा हलका रा केशवरायपाटन मांय जूना भगवान केशवराय मंदिर अर आरे-सारे रा हलकां रो दौरा कीनो। वे नाव मांय बैठ र चंबल नदी रा एक ऊं दूजा छोर ताई रो जायजो लीनो अर रंगपुर गांव मांय घाटां रा मौजूदा हालात देख्या। ई मौके श्री बिरला कह्यो के केशवराय भगवान रा ई पावन धाम

अर पूरा हलका मांय विकास सारू करीब 45 करोड़ रुपया री योजना बनायी ज्यी है। वे कह्यो के ई रे जरिए मंदिर ने और चोखो बणावण, नुवा सुबीता विकसित करण अर आध्यात्मिक पर्यटन रा बुनियादी ढांचा रा विकास रा काम कराया जावेला।

000

जयपुर मांय आज राजस्थान फ़िजियो समिट सुरू व्ही। विधानसभा अध्यक्ष वासुदेव देवनानी इण रो उद्घाटन कीनो। ई मौके वे विद्यार्थियां ऊं वां रा काम ने केवल ईलाज नहीं बल्कि सेवा अर साधना रो जरियो बणावण बाबत कह्यो। दो दिन रा ई सम्मेलन मांय देश रा 30 विश्वविद्यालयां रा दो हजार ऊं बत्ता नुमाइंदा शिरकत कर रह्या है।

000

राजस्थान लोक सेवा आयोग री ओर ऊं पुलिस उप निरीक्षक अर प्लाटून कमांडर भर्ती-2025 रा पहला दिन री परीक्षा प्रदेश मांय एक हजार 174 परीक्षा केन्द्रां माथे आज शांति सागे व्ही। आ परीक्षा देवण सारू 7 लाख 70 हजार उम्मीदवार नाम मंडाया है। दो पारियां मांय परीक्षा करावण सारू पुलिस अर प्रशासन री ओर ऊं जरूरी व्यवस्थावां करीजी।

000

सलूबर ज़िला रा लसाडिया हलका रा घाटा अर लालपुरा गांवां मांय लारला दिनां पांच बच्चां री मौत रा मामला मांय एसडीएम दिनेश आचार्य स्वास्थ्य विभाग री टीम सागे मौके पूग र हालात रो जायजो लीनो। मेडिकल टीम घर-घर जा र बीमारी रा कारणां री ठा करण सारू जरूरी नमूना भेळा कीना। प्रशासन ई हलका मांय निगराणी तेज कर दीनी है।

000

धौलपुर मांय राजस्थान पशुचिकित्सा अर पशु विज्ञान विश्वविद्यालय, जोबनेर री ओर ऊं पशुपालकां सारू एक दिन रो सिखावण शिविर लगायी ज्यो। इण मांय कृषि विज्ञान केंद्र रा प्रभारी अधिकारी डॉ. योगेन्द्र कुमार मीणा पशुपालकां ने उनाळा मांय ढांढा-ढोरां रो खास ध्यान राखण री राय दीनी। वे पशुपालकां ने महकमा री खास योजनावां रा बारा मांय ई विगतवार जाणकारी दीनी।

000

कोटपूतली बहरोड़ मांय आज मधुमक्खियां कानी डंक मार देवण रे कारण बारह जणा जख्मी व्हे गया। दो जणां री हालत गंभीर व्हेवण रे कारण वां ने जयपुर रैफर करी ज्या है।

000